



jèkabaara



"ni jèkafò ye daamu ye,
jèkabaara nyogòn daamu tè."



nimòrò 10 - san 1986n okutòburu kalo - a sòngò : dòròmè 20



Min bè sòrò nimòrò in kònò, o filè nin ye :

- | | |
|-------------|---|
| nyè 2 ani 3 | Antipodes : dinyè seleke naani yiriwa siraw kumbèn yòrò |
| nyè 4 | Tiga sènè baarada kunnafonti : ka bò Buwala |
| | Duguw kumakan : ka bò Kakoyina |
| nyè 5 | Cikè dönniya : kòori nyuman sòrò |
| nyè 6 ani 7 | Jantoyèrèla kòrò ko ka nyi : kalan dò kèra Zambala |
| nyè 8 | Tulon tè sèbè sa : misi kun |
| | kènèva sabatili ani lafiyadibi kan |

ANTIPODES

dinyè seleke naani yiriwa siraw kunbèn yòrò

Bamakò kònò, Faransi jamana dònniya sabatili so la, minisiri min nyèsinnen bè denmisèn kulu ni farikolo nyènajè ni dònniya sinsini ma, o ye kènè dò dayèlè mè kalo tile 3 san 1986 la. O kènè tògò dara tubabukan na ko "Antipodes" (n'o bè kalan ko "antipòdi"). O tògò in b'a jira ko dinyè seleke naani bè kofò o yòrò la.

O yòrò in na, jèkulu caman bè nyögòn sòrò yen, jèkulu min bè baara kè jamana ka nyètaa bolo kan. Kènè kelen in kan, bololabaarakèlaw fana ma to kò; u ka miiriyaw n'u ka fèn dilannen bè bè walawala yen.

O la, kènè in kèra nyögòn kunbèn yòrò ye. O nyögòn kunbèn in kònòna na, kunnafoni bè jiidi, ka hakiliw lafon, ka jèkafò sabati dònnikèlaw, bololabaarakèlaw, kalandenw ani dunanw ni nyögòn cè.

Mun ni mun bè kènè in kan?

Kènyèrèye ka baaradaw b'u ka fèn jira yen, ani fasoden minnu bè baara kè Mali fan tan ni naani bèg la. Kunnafoni bè di gofèrènama ka baara kan, ani sènèkè baaradaw, ani Mali dèmèbagaw minnu bòrà Mali kò kan ka na baara kè Mali kònò.

O la sa, ni mögò sera yen, fèerè minnu bè tigè Mali yòrò dòw la ka jamana bò nògò la ka Mali nyètaa sabati, i na bò o fèerè caman kala ma, k'a ta balikukalan ni sènèkèminèn dilanni na, ka taa a bila lafiyadibi kuraw la, biriki gosi minènw ani si tulu bò mansin bèe la.

Tile funteni n'a yeelen barika bè yèlèma cogo min ka nafalanw bò a la, o fana bè jira yen, ani sisikurun kà nègè sira ani fèn nafama caman ka bò Mali yòrò bèe la.

Nyènajè yòrò fana bè yen, jeliw bè ka fòli kè yòrò min, ani fèn dilannen feere yòrò.


Antipodes ko bèe latèmè cogo kalifara Faransi jamana dònniya sabatili so la Bamakò. U ye bagi walomba dò dilan, ka mögò bisimila ni nyègèn kòròma dò ye bagi walomba in kan. Nyègèn in bè Faransi taamabaga Erènè Kaye jira, a sera Tumutu tuma min, nyinan y'a san 158 ye.

miriya nyuman in man kan ka kè waati kelen ko ye

Antipodes in kènè dayèlè ko in kèra miiriya nyuman ye Mali kònò, min bè se ka mögò sòn hakili la, k'a dèmè nyètaa ko la.

O ko nyuman in man kan ka kè waati kelen ko ye. A ka kan ka kè san nataw la fana, walasa baarakèlaw, dònnikèlaw, ani dinyè nyètaa jateminènaw k'u seko n'u dònko jira nyögòn na yen.

Antipodes in ka kan ka kè an mumè bèe ka kunbèn yòrò ye, walasa mögò o mögò, jèkulu o jèkulu b'a fè k'a ka walew jira, o ka se k'a ye kènè kan yen, bèe ka se k'u ka dònko n'u hakilina jira. O mana kè, bèe bè nyögòn ye yòrò kelen na, ka jè ka kuma; Antipodes bè kè bèe ta ye, duguba kònòna mögò fara wula kònòna mögò kan, bèe ka bò nyögòn nun ma, bèe ka nyögòn sòn hakili la.



Kòori sènè baarada ka yòrò filè nin ye, n'o bè nògò kumu funteni dilannen de jira (ni dòw b'a wele ko "biogazi"). Funteni min ko don, a bè se ka jò dògò nò na ka tobili kè; a bè jò fitinè nò na ka yeelenba di.

- Nògò kumu funteni bè labèn bara dilannen min kònò, n'o fanba bè dugu jukòrò, o bara datugu koorilen filè dugu ma ja in numanyan fan fè.

- Yeelen dilan dulonnen bè san fè, ja in kininyan fan fè



- Sèbèn min filè ja kininyan fan fè, o bè kunnafoni di nògò kumu funteni dilan cogo kan.

- Sèbèn min filè numanyan fan fè, o bè CMDT baarakè yòrò de jira Mali kònò.

Baarada min bè Mali kònò, n'o nyèsinnen bè sènèkèminèn dilanni n'u sègèsègèli ma, o ka fèn dilannen dò filè nin ye Antipodes yòrò in na.

O ye si kòlò baara minènw ye:

- kòlò cilan
- sikòlò dibijana
- tulù bolan.



Dèsèbagatòw fana b'u jeni yòrò fin kènè in kan, k'a jira ko u fana bè baara kè.

O baara nafama dò filè nin ye ja in numanyan fan fè : o ye gabugujana nègèman dilannenw ye u fè.

Min filè nin ye ja in kininyan fan fè, o ye tufa kologirin dilan minènw ye, n'o bè jira kènè in kan Faransi denmisènw ka jèkulu fè, min nyèsinnen bè jamana dèmè ma nyètaa baaraw la.



Ka bò Buwala

Buwala kèra yiriwali tòn dugu ye san 1985 la. Nyinan feburuye kalo, ODIPAC ye kalanden jolen mögò fila nyini an fè, ka taa u kalan mòsónya kalan na Nègèla kalo kelen kònò. O mögò fila tun ye Cèman Kulubali ni Cèkura Kulubali ye. Kalan kuncé don, u ye sojò minèn caman d'u ma.

Nyinan, ODIPAC ye Buwala-kaw dèmè ka mangasa kelen jò. O jòjan kèra mètèrè 18 ani santi-mètèrè 90 ye; a jòsurun ye mètèrè 6 ani santimètèrè 30 ye. Baara in kèra Buwala dugu mögòw fè: cè 100 ani muso 100 ye baara in kè. Mòsòn kòrò mögò fila ye kuraw dèmè, n'o ye Dawùda Kulubali ani Cèsolo Poli Kulubali ye.

Baara in musaka caman doni

tun bè ODIPAC kun : tòli ani simòn, ani konw. Dugu jòyòrò kèra biriki bò ani baara kèli ye. Dugutigi y'a birikiden fòlò da.

O tèmènen kò, Buwala ye suman gosi mansin ani nyò si mansin nyini ODIPAC fè. Olu sera Falajè ka ban.

**Can Kulubali ani
Dawùda Kulubali
Balikukalen karamögòw**

Ka bò Kakoyina

Nin ye sèbèn ye k'a ci Jèkabaara nyémögòw ma, Jèkabaara sòngò ko la.

Fòlò, an tun bè Kibaru san dòròmè naani. Kosa in na, o kèra dòròmè duuru ye. Jèkabaara sòngò nana caya n'o ye. O sera fo dòròmè 20 ma.

Kibaru furabulu ka ca ni Jèkabaara ta ye, a kònò kumaw fana ka ca n'a ta ye. Nka, jèkabaara nafa kònì ka bon ni kibaru ta ye : a bè wale nafama caman fò an ka baara kétaw kan, ani an labèn cogo nyumanw kan ka kè an yèrè ta ye.

Nka, o n'a ta o tè, dò bè se ka bò Jèkabaara sòngò la, k'a d'a waati cogoya kan. Kibaru daminè tuma y'a sòrò, nafa bè cikèlaw la ka tèmè bi kan. An tun bè se ka kibaru bakuruba san. Nka, bi waati cogoya kanma, an tè se k'o kè bilen. Jèkabaara bakuruba sanni ye shè kili fila siri ye bi, bari a bè bèn dòròmè 240 ma. O ka ca anw hakili la.

An b'a nyini Jèkabaara nyè-

mögòw fè, u ka dò bò a sòngò la. O mana kè, mögò caman b'a san.

Dosama Kulubali

kalan min na, o kana tinyè. Nka, olu wajibiyalen don k'u ka waribolen ladon.

nyinini jaabi

Tinyè don, Jèkabaara furabulu hakè ka dògò ni kibaru furabulu hakè ye. Tinyè don fana, Kibaru sòngò ka dògò ni Jèkabaara ta ye.

Mun y'o kè ?

Kibaru bè bò tuma min na, o y'a sòrò, cikèlaw tè a nafa dòn. O kosòn, gofèrènama ma sòn a ka feere a sòngò hakika la. Kibaru tun bè dilan dòròmè 15 nyògòn na, k'a feere dòròmè 4. Wari misèn ko kosòn ani furabulu cayalen kanma, a sòngò kèra dòròmè 5 ye.

Nka, gofèrènama tun b'o kè walasa ka cikèlaw deli sèbèn kalan na. Sisan, cikèlaw delilén kè, mun kèra ? Kibaru bòli dabilala, k'a d'a kan a sòngò tè se k'a dilanni musakaw sara.

O de kanma, ODIPAC ni CMDT jèra ka jèkabaara dilan k'o bò, walasa cikèlaw delila sèbèn

Bi, Jèkabaara furabulu ye naani ye, n'o bè bèn nyè 8 ma. O de bè feere dòròmè 20. O ye sòngò ye, CMDT ni ODIPAC dinyèna k'a feere min na; n'o tè, Jèkabaara dilanni musakaw ka ca n'o ye kosèbè.

Jèkabaara dilanni dòròn ènpirimeri la (n'o ye gafe dilan yirò ye), o bè bèn dòròmè 16 de ma. O dun b'a sòrò a sèbènna bolo la, k'a gosi mansin na, k'a jaw n'a nyègènw bée dilah ka ban. A donini n'a tila-tilali k'a lase cikèlaw ma, o si musaka tè dòròmè 16 in na.

O la, aw yèrè k'a lajè : n'an ko an b'o bée jate minè, ka sòrò ka Jèkabaara feere a sòngò hakika la, cogo min an tè bin, a sòngò bè caya ni dòròmè 20 ye. Nka, dinyè kèra a kan k'a feere dòròmè 20, walasa a sòngò kana caya ka dama tèmè.

An k'an ji ja k'o faamu, yaasa Jèkabaara fana bòli kana dabila.

tiga séné baarada kunnafoni

duguw kumakan

kòori nyuman sòrò

Mali jamana ka kòori tè bérè ye kòori san yòrò la dinyè kònò, k'a d'a kan jamana dòw bë kòori sènè ka témè Mali kan kosèbè, a fòra cogo min na jèkabaara nimòrò 6 kònò. Nka, kòori jòyòrò ka bon Mali ka nafa sòrò fènw na, bawo a ka kòori sènèlen fanba bë fèere farajè jamanaw la.

O sababu la, fo k'a lajè kérènkérènnenyà la ka kòori mugu nyuman lase kòori feere yòrò ma Mali kò kan, min bë se k'a sanbagaw nimisi wasa.

kòori min ka di gaari dilannaw ye

Kòròlen, farafinna tilebin fè jamanaw ka kòori tun ka di kosèbè gaari dilannaw ye, k'a d'a kan, o kòori bò baara bë kè bolo la; barisa, ale ka fisa, a jèlen don, a saniya kun tè mansin na; mansin bë tinyèni min kè kòori la yòrò dòw la a saniya tuma na, o tè kè an ta la.

Ni musow bë kòori parata, u bë kòori dolo fu kunba jèlenw woloma k'olu ta. O b'a jira ko n'i y'a mèn ko kòori nyuman, o ye kòori mugu ye, min jèlen don kosèbè, a bë yelenku, nyaman nyaman t'a la, a fu ka jan.

kòori ladon cogo

Kòori nyuman sòrò sababu ye a ladon cogo ye sènèkèla fè, ani sanji na cogo.

Ni sanji ma labòli kè, kòori sun t'a ka baara kè k'a foori, kòori kuruw tè kògò, u kògòbali bë dayèlè. N'o kèra, kòori kuru fara jalanw bë kè kòori la.

N'i ye dugukolo labèn ka nyè, k'a ntugun ci, k'a buluku, k'a shyèn, o bë kè sababu ye ka kòori kuruw kògò, k'u fu janya.

Furakèli fana bë kòori kisi fènnýènamaw ka tinyèli ma. N'o kèra, kòori fu nyè tè tinyè.

kòori bòli

Ni kòori kuruw cira, k'a dayèlè, i b'i teliya a bòli fè; n'o tè, tile b'a nyè gese. Ni sanji labanw ye kòori gosi, k'a sòrò a ma bò, a fu bë fin; kòori dolo minnu binna, bògò b'olu nyè tinyè, fura bulu jalan minnu nòròlen bë kòori la, olu b'u nyè bilen.

Mara dòw la, nfirinfirinin min kofòra jèkabaara nimòrò 8 kònò a nyè 7 la (n'a bë wele tubabukan na ko "bemesiya"), o nfirinfirinin bë bo kè kòori fuw kan. O bo ye fèn manama ye, i n'a fò di nòonò. O bë nòrò kòori kan, k'a tinyè. N'i y'o waleya kète ye, o b'a sòrò kòori mèenna bòbali ye foro kònò.

Kòori nyè nyèli n'a tinyèli tè sènèkèla se ko ye tuma bëe. Nka, nyaman nyamanw, i n'a fò fura buluw, kala kala misènw, kòori kuru tinyèlenw ani nògò wèrèw, olu nyagaminen kòori fu la, o ye kòori bòlaw nò ye.

Kòori woloma ka kan ka kè kabini kòori bò waati. Kòori bòlaw bëe ka kan ka kè ni bòrè fila ye : kòori nyuman bë kè min kònò, ani cèjugu bë kè min kònò.

Ni forotigi y'a ka gadew walima töndenw bila kòori bò la, a ka kan ka mògò kelen kelen bëe ka baara këlen kòlòsi. Bëe b'i ka kòori bòlen ton a dan ma, walasa k'a sègèsègè ni min bò cogo nyèna ni min ye.

kòori feere yòrò

Wale dòw fana ka kan ka matarafa kòori dògò la, walasa kòori kana tinyè : kòori dògò ka kan ka shyèn, ka furan, k'a buguri n'a nyamanw cè ka taa fili kò fè.

Kòori siritò, a pesetò, ani mobili lafatò, kòlòsili bë kè walasa fini kolon, sèbèn fura walima siri bòrè kunkurun si kana don kòori la. Barisa, mansin tè se ka nin fènw ninnu bò kòori la : kòori wurusi mansin b'u tigè-tigè, o kunkurunw bë nyagami kòori fu la. O dun mana kè, sèbèn fura ni mana ni fini kolon kunkurun ninnu bë gaari dilannaw sègèn, k'a d'a kan, u nyagaminen bë to gaari la fo ka taa se bagi dilannen ma. O nyògòn bë kè sababu ye ka Mali ka kòori mangoya a sanbagaw bolo.

***Kòori nyuman sòròli bë kè sababu ye ka hèrèba
lase Mali ma, ani kòori sènèla bëe ma.***

jantogèrèla kòrò ko ka nyì

Kalan dò kèra Zanbala kènèya sabatili ani tobilikè dibi kan

Dugu saniya ani kènèya sabatili siratigè la,
Bugunin mara dògòtòro ni kòori sènè baarada
kalan nyémögòw jèra ka sè Zanbala dugu kònò.
Kalan dò kèra yen tile fila kònò, min nyèsinnen
bè saniya ma, ani lafiya dibi dilanni.

saniya baara kalan

Bamananw ko "kènèya ka kòrò ni fèn bée ye". Hali dugu ka sòrò bée sirilen bè sènè min na, o tè sabati kènèya kò.

Bana kùnbèn ka fisà ni bana furakè ye. An ka kalan in kònò, an da sera ji saniyalì siratigèw ma, n'o bè kè sababu ye ka dugu mögòw tanga banaw ma, minnu bè sòro ji fè, i n'a fò kònòboli kunfilatu, tògòtògònin, suma, an'a nyögònnna wèrèw.

ji saniya

Ji bè se ka nògò mögò ni bagan banakòtaa de fè. Ji bè nògò fana ni bagan y'i min kòlòn da la, walima ni fini, mögòw ani minènw bè ko kòlondaw ni ji sigi yòròw la.

Ji bè nògò ni kòlòn bè sutura ni jigijigin cè.

Ji bè nògò ni kankun ni datugulan tè kòlòn min na.

Ji bè nògò ni juru filen bè bila dugu ma.

O la, yaasa ji kana nògò, minèn, fini ni mögò koli ka kan ka dabila kòlòn da la. Bagan lamen yòrò bè janya kòlòn da la. Kòlòn ni sutura cè bè janya, kòlòn fana tè sen sutura ni jigijigin cè. Kòlòn da bè dilan, ka kankun ni datugulan k'a la. juru filen bè dulon ntuloma dò la.

Sani an ka ji duurulen min ten, an b'a sènsè, walima k'a wuli.


Kòlòn da dilan cogo

Kòlòn kankun bè kè siman na, k'a janya kè santimètèrè 70 nyögòw ye. A baara bè kè ni cèncèn ye, ani kaba ni jiri ni siman: siman bòrè kelen bè nyagami

cèncèn buruwèti nyè naani na.

An bè kankun lèmini ni mètèrè kelen nyögòw ye bélè walima cèncèn na, walasa ji nògò kana sigi kòlòn da la.

Kòlòn ka kan ka datugu.



Nin kòlòn nyögòw bè labèn ni fèn minnu ye, olu filè :

- siman bòrè 4
- cèncèn wotoro nyè 10
- bélè kisè wotoro nyè 10
- jiri wotoro nyè 1

Min filè san fè, n'o bè juru sama nògòya mögò bolo, n'o tògò ko "puli", numuw de bè se k'o dilan.

Sutura ledilanni

Sutura ye dingè ye, min sen-nen don banakòtaa kanma, n'i b'i sonsoro a da la ka banakòtaa kè.

Sutura man kan ka sen kòlòn ni jiginjigin cè; fo mètèrè 15 nyògònna ka sòrò kòlòn ni sutura cè. Sutura ni si so cè ka kan ka kè mètèrè 6 nyògòn ye. Kòlòsili bè kè yaesa sutura kana se dugu jukòrò ji ma, a n'o cè ka kan ka kè mètèrè kelen ni tila ye.

Sutura kònò bonya bè kè mètèrè kelen nyògòn ye. O dunya bè se k'a ta mètèrè fila la, fo mètèrè duuru.

Dali bè dilan ni minènw ye, kòlòn da kankun bè dilan ni minnu ye. Yòrò dò bè labèn dali jukòrò, dali bè se ka. sinsi min kan. O yòrò bonya bè kè santimètèrè 10 ni kò ye.

Bògò min bè bò sutura sentò, o bè kè banbe ye, ka dali lamini mètèrè kelen nyògòn hakè la. O banbe man kan ka kòròta ka tèmè dali kan.

tobilikè dibi luga

An da sera lafiya dibi dà ma kalan kelen in sen fè, n'a tògò ye ko "luga". O bè dilan ni kaba kuru saba ye; barama bè sigi a kan; da kelen b'a la, dògò kala fila walima saba bè se ka don min fè.


Dibi luga in nafa ka ca : a dògò santa ka dògò, a bè kungo kònò jiri lakana, bawo a ka dògò jenita nyògòn fila de bè jeni gakuru tòw fè. A bè funteni mara, a tobili ka teli.

tobilikè dibi luga dilan cogo

Kaba kuru saba sigi cogo bè bò barama bonya la : bolo muru jòlen, ka bolonkòntikunba fana lawuli k'o jò a kun na, olu kundamana de ka kan ka sòrò barama ju ni dugu cè.

I bè kaba kuru saba in datugu ni bògò ye, min ye bògò fasa ye, min nyagaminen don ni cèncèn, misi bo, ani bin nyaga ye, ka dò fara a fasaya kan.

Dògò don wo bè tigè a la a jòli tile kelen ni su kelen tèmènen kò




fè. N'a pèrènna, i b'a wo labonya ni muru ye, ka bògò kènè kè k'o nòrò.

Sani kalan in ka kuncè, an ye baara kè denmisènw fè, ka kòlòn da kelen dilan ani sutura kelen.

Dutigi kelen kelen bèe ko k'u bè nin baara in nyògòn kè u ka du kònò, min bè kè sababu ye ka kènèya sabati dugu kònò.

An ye tobilikè dibi luga kelen jò, min nyògòn wèrèw bèna jò dugu mògòw fè.



tulon tè sebè sa

misi kun

Nin kère cè saba ye : Zan n'a denkè Nji, ani dugutigi.

Zan n'a denkè Nji ye dugutigi ka misi sonyè k'o faga. Misi fagalen, Zan ye senw ni kunkolo di a denkè ma a niyòrò ye. Nka, Nji jònna o la.

O kèlen, dugutigi nana wuli a ka misi nyinini la. A sera Zan ka foro la k'o denkè Nji sòrò yen, k'o nyininka. A ko : - "Zan ka Nji, e ma ne ka misi ye yan wa?"

Nji ko : - "Owò dugutigi, n y'a ye. Nka n fakè Zan y'a minè foro kònò, k'a faga."

O fòlen, dugutigi ma kuma tugun. Nji fana bolila ka na a fò a fa ye. A ko : - "Baba, misitigi nana a ka misi nyininkali kè ne la. N ko k'i y'a faga."

Zan ko : - "A, Nji, i ma nyuman kè dèrè. Sababu jumèn na i y'a fò ?"

Nji ko : - "E, n y'a fò kè. Bari ne jònna n niyòrò sogo la."

Zan ko : - "N denkè Nji, yala ni n ye sogo dò wèrè d'e ma, i bè se ka an ka misi sonyè kè nkalon ye wa ?"

Nji ko : - "Unhun ba, o man gèlèn. N bè i bò nin ko la."

O fòlen Nji fè, Zan ye woro kelen ni kaman kelen di a ma, ka fara senw ni kunkolo kan.

O tèmènen kò, dugutigi ye du-gu mógo bée wele a ka bulon kònò misi ko kuma in na. Kuma sigi-lén, dugutigi ye Zan nyininka. A ko : - "Zan, e denkè ko i ye ne ka misi sonyè k'a faga. Yala tinyè don wa ?"

Zan ko : - "An kuntigi, tinyè tè mi.. mi.."

Zan tora da sigisigi la. Bulontigi nana pèrèn. A ko : - "Yala i man kènè wa? E denkè bée sòn k'o sonyèli nkalon da i la?"

Zan ma sòn k'i jò misi faga in

kòrò, cogo si la. U ye ci bila ka Nji wele, Zan denkè. A nalen, a fa y'a nyininka. A ko : - "Nji, dugutigi tun b'a ka misi min nyini, ko è ko ko ne Zan de y'a faga ?"

Nji ko : - "tinyè don, ne y'a fò."

Nji seginna k'a fò dugutigi ye ko misi senw ni kunkolo b'ale bolo so. O y'a sòrò, Nji fa ye ntulen fana faga. Nji bolila ka taa ntulen in senw n'a kunkolo ta ka na o bin jama cè la bulon kònò.

Nji ko : - "Ayiwa, dugutigi, ne fa y'i ka misi min faga, a senw n'a kunkolo filè nin ye."

Dugutigi dimina Nji kòrò. A ko : - "Zan, mun na i bè nin den in mara. Mògò tè, lagalagatò don. Kònò ni misi ye kelen ye ? N'a bè taa o senw n'o kun ta ka na ko misi jòlanw n'a kun y'o ye, a k'a ku ta ka bò n ka bulon kònò."

Nji y'u to kuma tò la ka taa misi senw n'o kunkolo jeni. A bannen o la, a ye fèn ninnu ta, k'a b'u don daga kònò, k'a sigi tasuma kan. Nka kunkolo balanna daga dà la binyèkolow bolo. Nji m'a dòn, a b'a fò cogo min : bari a tè se ka taa a fò a fa nyè na bulon kònò ko misi kun ma se ka don daga kònò..

Nka Nji taara a fa Zan nò fè dugutigi bulon na. A selen a ye kuma fò. A ko : - "E ka ba sigilen filè n'a gèlèw ye, i n'a fò ko gèlè balannen bè daga da la.."

Zan y'a jaabi. A ko : - "E ta nín ye mun kuma ye ? Jeje bè funtun kònò."

O fòlen, Nji seginna ka taa jeje ta funtun kònò, ka binyè-kolow tigè, ka kunkolo don daga kònò, k'a sigi tasuma kan.

Sogo mòlen, Nji wulila tugun k'a bée taa a fò a fa ye dugutigi ka so ko misi kun mòna. A taara a fò. A ko : - "Baba, mò fòlò denw ko k'u ka kòrò ni ne ye..."

Zan ko : - "Nji, i makun, e sòrò tuma ma mèen, jigin-ka-suma san den y'i ye."

Nji seginna ka taa misi kun jigin ka bò ta kan, a ka suma.

Sogo sumalen, Nji ko a bè sogo ta ka bila ga san fè. Nka a bolo tè o sanfèla sòrò. A taara a fa nò fè tugun. Hali bi olu bè misi ko kuma na. A dun tè kun. Nji la ka sogo ko fò fa ye dugutigi ka so.. Nji sera Zan ma. A ko : - "Baba, bolo dè-sèdenw y'i fo."

Zan ko : - "Marabahani. Kolon biri."

Nji taara kolon biri ka yèlèn o kan ka misi kun mònen bila san fè sani a kuma ka ban dugutigi ka bulon na.

Kuma bannen, Zan ni Nji nana u ka sogo dun k'u fa.

Nji y'a fò cogo min na, a y'a kè ten. Bari a y'a fa coron ka tila k'a bò. Dugutigi ma se ka cogo si sòrò misi ko in na Zan n'a denkè Nji bolo.

